

5563.8  
2393.1  
v.2

超  
齋  
遺  
稿  
序















燕超齋遺稿卷之四

詞

擬秋風三疊

秋風淒緊今塞鴻南飛浮雲掩翳今白日曠其無輝  
嚴霜凜凜今砭人肌黃菊粲粲今叢蘭萎所懷伊人  
今來何遲殘釭憧憧今夜漸移撫枕輾轉今余懷誰  
知願言思子今使我心悲

秋風蕭瑟今寒颼颼登高騁望今我思悠悠曠野綿  
邈今山川阻脩草木黃落今嘆日月之如流靜坐二  
室今離羣絕儔扶策出門今誰與遨遊酌彼清醪今



聊以寫憂願言思子今使我心愁

秋風淅瀝今征鴈嘶天宇崢嶸今白日徂西矯首遠  
眺今意轉迷村墟寂寥今夕烏歸棲玉露篩空今螀  
蛄悲啼耿耿不寐今坐聽晨雞明月入戶今虛幃低  
願言思子今使我心淒

擬古長相思二首

朝斷腸暮斷腸滿庭梨花明月光夢回愁洞房書千  
行淚千行南雲萬里歸路長何處是瀟湘  
朝相思暮相思衰燈耿耿照羅帷深院暗更移猿聲  
悲鴈聲悲半床殘月夢天涯相逢知幾時



長相思詞 曉臥

一雞鳴二雞鳴淒淒風露動簾旌薤簟有餘清東窓  
明北窓明知是扶桑旭日生村逕幾人行

擬宋之問冬宵引寄司馬承禎

天地閉今玄陰寒節旣晏今巖扉闐攀瓊樹今臨層  
嶠極遐眺今絕凌歷層嶠巉巉杉檜鳴微逕遙遙人  
不行欲訴衷曲無人知願言思子難爲情

擬司馬承禎答宋之問冬宵引

歲云暮今霰雪深羣峰攢今愁人心對素月今撫雅  
琴感索居今多苦音雅琴泠泠雲竇邃靈草翻翻寒



不死手持琅玕欲贈之瞻彼關山遠莫致

訪金斯文次元不遇將歸俄而主人至

蔭長松而採菊風颼颼以吹衣望之子而未來竟怊  
帳以言歸

主人至而留客坐宴語以褫衣登林臯而延矚日將  
夕以忘歸

北風四章

北風擬古也

北風厲發歲聿其徂穡人告息并稅旣輸我庾無粟  
我箱無繻孰餬余口孰針余襦母曰嗟子婦曰嗟夫  
入此室處以煥爾軀匪室弗寧官實我嘑命汝于役



北山之隅胥吏秉箠余呵余驅匪哀余籲匪惜余膚  
載渴載飢瘠其曷蘇載顛載踣仰天以吁

氓之蚩蚩匪識義行祈寒是咨調飢是病燠之斯悅  
飽焉斯慶相昔先民克明克聖匪民何畏匪民孰敬  
拊斯育斯用遂厥性是勞是徠俾安厥命含弘廣博  
和我萬姓役哉維時民趨是競民之用競式化厥政  
或反厥猶視徃猶弇誰昔然矣維時之競

瞻彼之山維石巖巖鋌斯鑿斯于山之南不遑寧息  
憂心如惓朝以及夕余飢曷堪有風自北余寒曷任  
霰雪其零以暄以陰有鳥爰飛投于北林載飲載啄



我思欽欽繫我之褚有錢維三招招遠賈買粟以搏  
既採之烝亦漑之鬻濯濯者粟匪粟伊糠于以棄之  
于彼周行人實我迂是用自傷

大車檻檻載馳載驅羔裘如濡洵美且訏彼其之子  
邦之大夫從者如雲溢我通衢維嬭維孺聚觀于塗  
彼其之子秉國之樞將化是宣將民是拊胡民之瘡  
靡聞靡覩彼實不明爲瞽爲盲彼實不聰爲聵爲聵  
嗟我蒼生孰恤于窮我以歌之俾觀民風

白露六章

白露懷友也時維七月獨坐無侶有感于心



寫而爲詩

淒淒白露嚶嚶草虫明發不寐憂心忡忡風雨交集  
祇攬余中塊獨處此余莫與同

白露淒淒草虫嚶嚶願言思子憂心忉忉舒窈糾兮  
我歌且謠焉得斗酒以永今朝

七月流火白露其涼有美一人在彼西方欲徃從之  
路阻且長愛而不見使我心傷

陟彼北山言採其蟲未見君子何日可忘中心蘊結  
酌彼兕觥獨寐寤宿誰適爲情

苑苑茂松在彼山阿於焉蔭憩聊以嘯歌有美一人



在天之涯懷哉懷哉如何如何

睠彼東山零雨其霏我思之子曷日其歸西風暮起  
何草不腓搔首踟躕白露霑衣

次嵇康二章

余懷美人言陟崇山思之永矣有如流川昔也嬉嬉  
若管諧絃今焉未覲如間重玄逝將學道尚窮冥筌  
維以忘情聊以忘言

七月蟋蟀吟我空軒溥露暮零遙帷宵褰我友亡此  
中心靡歡有酒不御有棋不彈二人同心如芝如蘭  
胡爲不見搔首浩嘆



次陶淵明時運四章

我有斗酒以永今朝三畝之宮于茲樂郊軒敞牖豁  
仰瞻重霄有庭有除有藥抽苗

滄浪水濁我足斯濯平野夏濶聊以遐矚我歌且謠  
歡然心足有酒有朋云胡不樂

點言厥志舞雩浴沂豈無他人及爾同歸康耽于靜  
五絃斯揮我思之子遠矣曷追

樂彼之園其下維廬言速諸友笑語紛如何以爲娛  
有酒在壺酬我酢我唱予和予

嶺之高二章迭汝重



嶺之高高刺天送汝南征曷日其旋汝馬虺隤汝僕  
痛汝何爲乎天之隅我有諸父玆斃南土汝之云徂  
使我長吁我不如鳥有翼不能從汝于役汝歸京師  
尚能復來

嶺之高高以鬼送汝南征曷月歸哉汝驟契需汝僕  
疲汝何爲乎天之涯載臺載膏涉江以舠云徂南土  
寧我諸父夏六月兮首路雲冥冥兮又以雨汝之于  
役尚能良食

賦

遊蓬萊

次孫綽遊天台山



昔也孫興公之賦天台也蓋非身親履目親  
覩也特以寓其遐想也名山余樂也蓬萊又  
名山之首也余固一遊之願也寤寐不曾忘  
于中也然而地不甚邇也人事又喜違也余  
固不遑抽身也則余介介之懷將安所洩也  
此余所以自托於無能之辭而見其素所志  
也抑吾聞之也有志者事竟成也則余之竹  
杖也芒屨也飄飄於蓬萊頂也不遠也不但  
如綽也而止也

惟造化之磅礴峙羣岳於九有冥奧則台嶺秀異則



盧阜鬱翠嶺以相望紛角勝而矜持偉蓬萊之蘊靈  
表左海以爲之基限中黃而僻處曲士聞而然疑徵  
體勢於輿圖播逸軌於歌詩匪悅匪愜既窈窕既窕固  
靈仙之攸宅秦漢昧而不曉徒馳驚於渺茫譬南首  
而北矯歷千祀而靡覲乃貽笑於衆兆紛吾既有此  
遐心拔溫蠖而探道遂奮袂以絕跡歷吉日吾以行  
遵絕蹊而徑進云余造乎帝之庭經雲樓而容與縹  
氣濛於香城天路邈而靡極聊永日以媮情構琳宮  
以造天韻鏗鏘之流鈴指鴈門與毗盧川既漾而山  
嶸躡鰲頭以上戾睥鳥翼之下征香爐礙於曜靈元



青

寂隣於青冥縹余馬於瓊林掛余冠於雪屏丹桂膠  
曲以宗生瑤草猗儺以抽莖凌倒景而飄舉邀衆仙  
爲友生肅化鶴之令威期叱石之初平攀鐵鎖而登  
崖徑中絕而復通聆飛瀑而懷神鏡清波以修容窺  
穹篠之深洞壽藤錯於脩松卿霽承宇以斐斐仙禽  
和鳴而嚙嚙遺衆累而孤往籠萬象而瀉胸澹蕭散  
而神王曠余衷之發蒙異無竭之幻化撫南石之遺  
蹤爰有一老被服麗都說鉢余以前路又指余其攸  
居雲旂翼翼於檐除廣樂彤彤於坐隅錫余難老之  
方悅夫人之不我疏願刳心而銘骨領嘉誨以敬敷



斟瓊漿以獻酢續夏屋之渠渠要我乎藥珠之宮贐  
我以赤水之珠據曾城以俯眡宵一泓之歸虛陋區  
中之迫阨軼埃壒而遊虛無于時我佩惟華我驂旣  
閑歷覽無垠萬念俱捐其樂洋洋得天之全詠歸神  
臯採蘭靈川巖壑幽邃石磴連褰離上都之赫戲瞰  
十洲之雲煙翺翺遊遨飛步仙仙振袂萬仞之岡濯  
纓千尋之泉偃息芝田之館朗吟東華之篇執令德  
於正中豈外物之能間啓衆妙之秘鍵願言守吾太  
玄哂衆人之慕榮競捷捷而幡幡默無爲而凝六渙  
得意以忘言超鴻濛以高厲順元化而浩然



次幽懷

世與道而交喪兮歎流俗之寢卑抱良璞而索賴兮  
衆競指以爲非諒不周於今之人兮奚侘傺而獨悲  
默靖處於壤室兮庶極深而研幾踵先民之逸軌兮  
誰云遠而莫追志專專而不懈兮冀戰勝而身肥苟  
余行之不玷兮亦何傷夫仄微歷歲月而愈遠兮曾  
不改吾初衣循枉塗以徼福兮匪我心之攸希覽世  
人之偷窳兮職背公而首私念肉食之無謀兮中悶  
瞀而不夷厦屋撓而將圯兮何一木之能持迨未顛  
而經理兮猶泰山而四維昔共覲之朋淫兮放勛敷



其文思日月之固有明兮雲容容而蔽之鷹隼厲而  
猋猋兮鳳漂漂其焉歸孔棲遑而歷騁兮功未濟乎  
爽師輿轍環以游梁兮淹懷寶而干隋愍斯道之蕪  
絕兮豈榮達之足規枉尺而直尋兮余猶惡而不爲  
超絕跡而高厲兮及斯世而永違悲井渫而不食兮  
懷紆軫其語誰儻哲人之却慮兮登峻良而靡遺陶  
一世於熙皞兮雖終窮其亦宜

反招隱

有美一人兮山之陽芰荷爲衣兮芙蓉裳採採紫芝  
兮充我腸麋鹿與居兮鶴與翔蔭憩松栢兮歌考槃



登山臨水兮愴忘還諒真樂之在茲詎千駟其可移  
朝把鋤兮樊圃夕偃息乎衡宇獨寐兮矢不諼藉瓊  
草兮臥白雲桂子墜兮紛紛香氣氲石泉潺湲兮洗  
心魂睠彼東華兮紅塵塞途鱗鱗車馬兮載馳載驅  
電滅烟消兮不可以久桃笙葵扇兮於我何有鹿裘  
帶索兮容與濯纓兮蘭渚篳篥兮竹竿忘機兮心閑  
登山臨水兮愴忘還罇有酒兮瓶有粟稚子嬉兮山  
妻樂我心兮忻忻山中兮聊可以全身

月問

日在混淪誰判離之天何爲崇地胡爲卑日昇胡朝



月耀何宵晦朧朔朧孰主張之纖阿望舒孰驅將之  
澄圓縣空厥大幾何垢氛不洿孰是之磨孰是纏維  
而不傾墜其照何徧其體奚似惟蟾惟兔孰胚胎之  
妖墓之精乘何釁而爲灾擣成神藥誰服誰餐吳剛  
伐樹何辜何訐桂影婆娑其高幾許孰是培之孰是  
護之凡其根柢蟠于何所惟其枝葉蔭于何處瑤宮  
玉宇夫孰是成之廣寒清虛夫孰是名之湊合七寶  
誰其營之嫦娥安處孰配耦之胡爲不死而得延壽  
黃姑金母孰娣孰嫂羲和之旣揚安藏安匿吳牛何  
喘君思何覲周何所懷揚何所刻淪精委照孰以之



興隆離畢何澤從箕何風秋何所悽冷春何所和暢  
霓裳之曲誰者是唱唐辟躡梯云胡不跌胥玉以食  
何故辟疾蘆灰以環暈何隨缺蚌胎胡虛又奚以實  
江海之潮焉殺焉盛天柱竒翫孰因孰倩揜塞天眼  
夫孰以歌詠圍參七重狄心胡逞載魄終魄誰其證  
之河海山岳奚以影之南樓據床焉所取興青幢奏  
管霽翳奚淨媚婦何怨放臣何嗟孰悅而舞孰欣而  
歌一光并照何苦樂之異科愉者何鮮愁者何多君  
子離尤何所戚小人得志何所樂物理紛紜其孰究  
旃凡此之載誰其使然



煙

千家山郭一抹炊烟趁晚風而乍起引夕霏而相連  
鎖古陌之濃陰青槐裊裊帶平原之落照芳草芊芊  
暮鍾之聲隆隆未辨林中之寺鄉關之路渺渺剩添  
江上之愁樹影初開月照鹿門之岵蘭葉已密風起  
鸚鵡之洲野宿狝狝之師氣結十萬之竈歌傳龍蛇  
之曲影斷百五之辰川掛香爐之峰紫光橫亘日煖  
藍田之玉瑞彩氤氲織平林之漠漠沒高山之峨峨  
楚炬阿房不滅三月之火漢宮蠟燭盡入五侯之家  
潦盡清潭凝暮山之秋色舟橫夜月籠長淮之寒波



峰照燕雲連延五原之塞香焚魏闕浮動九重之天  
 崔司勳孤峰濕之句皇甫曾仙仗開之聯天上真仙  
 俯臨齊州九點壚頭醉客吟斷楊葉萬條漁翁罷釣  
 而歸江波淼淼樵子負策而返野迢迢赤壁塵兵  
 千里之舳艫無跡黃衣吹杖九疇之洪範有傳鬼嘯  
 叢篁湘靈鼓瑟客投孤店僕御催鞭依微兮青山影  
 裏繚繞乎綠樹村邊鶴骨道人燒九轉之靈藥厖眉  
 書客煎一甌之香茶金谷園中遊客傷心碧紗窓裏  
 織婦停梭縱橫斷續悠揚婆娑遠羣蒼梧之野迥接  
 赤城之霞灰寒博山之爐暗斷楚姬之腸花暗橫塘



之浦空傳越女之歌禪榻春深輕颺落花之風臺城  
人去深鎖垂楊之堤鴿原千里夢落郢門之樹漁舟  
一葉路迷武陵之溪匪霧似霧若雲非雲乍逐近而  
舒卷轉逶迤而繽紛俄一陣之風過了萬象之毫分

### 燈

夫至明者日至皎者月日方眖而遽隕月旣朏而就  
滅然則燭纖毫於幽昧之中貫晦朔而長明者非燈  
之功乎燈之時用弘矣哉若昔燧皇觀物剏智鑽木  
取火匪直烹飪之是資寔惟昏矇之斯破則聖人利  
澤之被物者寧不大哉若夫羲和稅鑪重雲布葉八



表同昏暝靄驟集庭宇邃其沉沉戶牖塞其冥冥目  
竄窈以無覲縱有覲而不明於是命童子移長檠金  
釭瑩爾以潔蘭膏澹然以清鼓煽炎上之氣吹噓地  
二之精俄素焰之爍爍耿一炷之熒熒靡幽不燭無  
細不形恍一室之散朗若復視於既盲訝明珠之曜  
彩疑旭日之朝生于時拾遺暢懷於綠醕吏部發詠  
於金粟綴花報喜載於西京之記吐焰如虹播於月  
蝕之作其他騷人之所摹擬墨客之所吟哢者紛不  
知其幾千百也雖然事非一致物有萬殊憂樂別歸  
男女異塗至若同袍之友音塵久阻今夕何夕邂逅



相過連床細語臥聽風雨筭年較老談詩說賦酒漿  
既屏雙影相隨惟此之時可愛非茲或有漂轉殊域  
家在天隅旅館風雪歲律云徂念切庭闈心係妻孥  
黑貂弊盡繁霜被頭羈思填膺累然長吁當斯之時  
匪茲誰儔迺有城南思婦中夜永歎君子于役曷日  
其返綉幌虛垂角枕空粲織成錦字誰與持看反側  
達曙心腸寸斷于斯之時茲實爲伴或乃深宮怨女  
君恩永絕紈扇在篋秋風蕭瑟逢夜曼曼中心如結  
朔鴈流哀寒虫幽咽玉筋雙墜青蛾孤嚔當是之時  
微茲孰親亮斯類之孔繁羌不可以殫陳乃若釋部



之長明上元之奇翫炎海之魚饒幽竈之漆盞紛襍  
出乎傳記信瓌詭而荒誕至於種學績文之流攻苦  
食淡之士焚膏油以繼晷兀兀以積昶明分彖亥  
精別魚魯舌耕乎五典三墳目擊乎九丘八索故能  
文章日益富聞識日益洽高步而爲一世宗垂訓而  
爲萬代法聲名震煥輝煌燁燁洋溢乎中華之國弛  
及乎蠻貊之士執此言之彼敏士鴻儒之所以進其  
德成其業者庸詎非茲燈之助耶如余者借輝匡衡  
之壁潑墨仲淹之幃遊心藝苑發憤忘饑剔短焰而  
對方冊矢終老而無相違亂曰惟燈之明燭我書今



我讀我書窮居諸兮挑兮撥兮其輝舒兮明照秋毫  
蒙翳除兮燈乎燈乎長隨余兮

雪

楚襄王遊於渚宮宋玉載筆而從俄而同雲驟集霰  
雪其濛矓然皛然飄揚從風王乃縱體竚眙迢然而  
眙曰樂哉與寡人共此者其大夫乎宋玉踣爾對曰  
敢問大王之樂何如王曰夫歲之方窮兮壤閟闢羣  
芳節離山川晦色寡人愀然靡所爲樂今茲之雪維  
天所錫寡人有酒侑以飡核窈窕佳俠籥舞交錯願  
與子樂之於大夫何若玉曰苟大王樂矣誰敢不樂



抑臣聞之、雪非一物、有喜有虐、王知之乎、王曰、寡人  
不足知此、試爲寡人陳之、玉曰、夫雪、乘一氣之栗烈、  
資清潔而爲質、凌穢毒害、滌除邪孽、惠而不靡、威而  
不殺、弄陰機而陵厚載、紛雜糅以委積、彷彿坳牧、侵  
淫谿谷、舞于山阿之松栢、羃于甌窶之宿麥、紆餘散  
漫、連娟蕭索、瑩兮若玄圃之積玉、皎兮若青田之舞  
鶴、埃塽屏遁、乾坤寥廓、爾其漚漚浮浮、乘凌回穴、清  
泠泠析醒、蠲疾離披、照爛升降、翕忽奪人目精、不  
可辨物、堅脆疏濁、功施不竭、悠颺轉移、入于瑣闥、逾  
鈎砌而歷玉堂、翱翔乎象魏之闕、離網戶、獵朱綴、抵



标

衡

離榭經砥室、然後襲于復陶、撲于縞襪、君王於是承  
昊皇之嘉貺、悅登稔之爲禎、荷茲祉福、拊彼鰥惇、黃  
髮鯢齒、忭于康莊、曾不知薄寒之中、人有如挾纊而  
熙春陽、阜國寧民、娛樂無央、此所謂喜雪也、或乃六  
氣壅閼、灾疢屢降、盲風厲發而號呼、天地回薄以相  
撞、雨雪大摯、容容貿貿、封條拉榦、增庠積厚、摧粹庶  
物、凌暴黎首、慘厲狂狡、萬象昏瞽、勃鬱蒼穹、霽岑繚  
戾、衡孔射牖、剗人膚腠、辱於矛戟、縱威怒而不歛、益  
增其沴毒、爾其主窳臣夭、澤不流於齊民、私大釣之  
深功、謂天畀余以良辰、考鍾鼓而擁幻艾、手與鰓而



間陳重觴以醺其心、復裘以煖其身、般遊逸豫、政刑放紛、耄倪駘籍於通衢、曾莫動其毫毛、敗國殄民、怨咨嗷嗷、此所謂虐雪也、於斯二者、王何擇焉、王曰善哉、論事寡人未之聞也、敬將滌心從事斯言、

駢儷

鏡湖堂重修募資檄

甲申代踈隱作

蓋聞鶴汀韜烟蕪沒林逋之宅、鰯渚鎖月寂寥孟浩之亭、游士顧懷於遙年、過客流歎於曠世、重新必待好事、終古傳爲美談、今夫鏡浦海外仙區、草堂湖邊絕境、爰有華榼肇自金公、金公諱德璋、溟州郡主之



後嘉隆間人也高視寰中遐觀物表濬發胸懷之妙  
包納造化之藏經始良圖山僧運成風之質落成高  
會方伯踐行春之期桂棟蘭栢平揖海雲之縹緲風  
櫺月牖斜對喚仙之岵峿萬象紛綸薦奇軒堦之下  
千里超忽獻態簾櫳之間允愜選勝之大方豈直賞  
心之極致爾其遙岑拱翠卷夕氛於員嶠方壺積水  
浮光霽寒雨於太湖夢澤軒皇迴蹕之野空留白雲  
茅君煉藥之臺猶餘丹竈隱隱江橋之色蒼蒼竹嶼  
之客鷁舟飄颻紅粧影斷鸞笙清徹碧桃花開翔鷗  
蹴波飛四時歷亂之雪游鱗躍藻泛三春澹淡之風



權夫歌吟吳兒少海之唱漁家物色郭熙平遠之圖  
若乃沙堤彌望溟渤靡際煙濤浩浩秦童迷採藥之  
舡星渚悠悠海客杳乘槎之路激崩雲於析木百川  
朝宗賓出日於扶桑六合清朗玄虛韜翰睥長瀾而  
思殫靈運含毫望幽墟而氣竭環觀獨絕偉蹟難窮  
向非締構之功何申結攬之趣是知沈隱侯之高閣  
增賁川原之奇陶山相之層樓大闡巖穴之美在昔  
同揆于茲益彰冠蓋聯翩指烟霞而爭鶩輪蹄交錯  
軼埃壒而競臻鐵索銀鈎飛騰石峰之筆瓊琚玉珮  
膾炙企齋之篇風流激昂賢豪一都之會英華蔚淳



賓主二難之并秋菊春蘭嗣馨香而靡絕茂松苞竹  
仰輪奐而長存豈知歲月浸悠棟宇且壞破窓頽壁  
寧觀翬鳥之容朽桷摧欒無復燕雀之賀瓦松長於  
簷角風雨漂搖土花積於庭心霜露淒冷簾前暮色  
攢碧嶂而含愁檻外寒聲蹙清湍而下愴游閑公子  
徊徨琴酒之高筵薦紳先生帳望詞翰之佳境業紹  
堂構豈無雲仍之賢家乏簾金莫施經營之力將使  
清風掃地芳躅隨埃緬然長懷寧不永歎某少也關  
東浪客老則湖西旅人訪風景於長洲徒懷子安之  
幽興瞻雲雨於落構不無老杜之悲吟蕭條湖海之



鹿

心牢落今古之感顧以扶風築榭知廢興之無常齊  
安製樓蓋因襲之有待苟無重葺之盛舉豈非吾黨  
之深羞若其工役之繁必須衆力而具聊飛折簡徧  
告同聲匪效西方之化緣聿遵山陽之遺事惟茲嶺  
海之際實稱綬冕之鄉通都大邑之相望崇開高門  
之錯峙欽崎歷落之士蔚乎代興倜儻奇偉之風居  
然可覩昔于襄陽之重士尚分買山之資郝叅軍之  
慕賢不惜營宅之費而况千古雲水之地羣賢風雅  
之場方將鼎新是圖豈以甃破不顧所覬無遠無邇  
雲合風馳自東自西響從景附指囷塵而無恠延壤



石以不窮有無各隨其儲豐嗇唯視其力搏心輯志  
歲事僇功木雖無脛而自來瓦非有翼而能至規度  
舊制發揮新觀幾年荒蕪生塵一朝突兀在眼則雲  
霞動色水竹增華芳草晴川漢陽之波瀾不歇江岑  
淮岫平山之軌躅可尋不惟游談之人揚美當世抑  
亦慕義之士繼蹤方來盍相勉乎斯不朽矣

箴

元朝箴

流俗之蚩蚩汝莫之能違也哲人之明懿汝莫之能  
師也言過于口今行僞于躬汝莫之能替也日月逾



邁汝莫之能愛也今茲王春之首今萬彙昭蘇也勗  
帥爾敬舍其舊而新是圖也

### 擊蒙四箴

誰謂女有瞳一丁之不知是亦矇己誰謂女有聰誨  
女而不聞是亦聾己不能操數寸之管曾不如無手  
不能讀萬卷之書曾不如無口衝衝翳路而活不如  
死之久矣

右徹頑

學之不興也我知之矣華腴之家驕以窳圭竇之子  
局以怠曾不知貴而不學階之爲賤賤而好學階之  
爲貴學之不明也我知之矣魯人怵難以自畫才人



徂易以自盈曾不知才而不學雖知必愚魯而好學  
雖闇必明嗚虘斯蔽不祛學何由成

右祛蔽

粵若稽古姬公上聖日讀百篇宣尼天縱三絕韋編  
楚史通明研精典墳董相命世不闕其園兒寬帶經  
而芸鉏路生截蒲以寫書聖以學聖賢以學賢矧我  
小子而敢多盤朝益暮習毋墮爾業誰謂華高跂其  
及而誰謂學難厲其庶而毋我藐藐咨爾童昧

右稽古

鼓篴發書如見大賓嚼英咀華如享八珍貫以誦數  
通以思索思之又思神明將告密勿晨夕罔或不勤



勤者衆妙之門惰者庶醜之根如農不力百晦其穢  
如賈不濟乃臭厥載小儒作箴誅爾蒙士 右廸志  
李君後泌自京師走書告余曰某之子齒長矣願  
惠之言以警誨之庶有助也余復曰敢辭斯作也  
古之人備矣余奚贅且已之惛惛而使人昭昭乎  
雖然君之先江東君於余家實有任安不去之義  
君又不替其舊有加厚焉今又乞言於余以敷其  
子此其意豈徒哉李君素貧窶也余嘉其饑寒之  
不卹而皇皇焉惟其子之無聞是懼詩云教誨爾  
子式穀似之李君有焉其子倘勉而不怠以就其



業則不惟李君之福余亦與有喜焉可嘿而息乎  
粗述舊聞爲四箴以勗之癸未良月朔朝吳幼清  
書

銘

枕銘

輪其仄幹其弱若將隕警爾寐夙爾作事不苑

書棚銘

腹有五經笥亦不能出一言以通其意凡百君子毋  
爾之似

慎獨銘



日入慝作不可知也夜士干掇幾匪彝也愆哉方寸  
厥微而危惟祗厥德戰戰兢兢無日無覩上帝鑑茲

### 瘞鶴銘

西隣有馴鶴鍛其翮寘諸庭爲疏網以閑之鶴拍拍  
軒翥不能越而絀焉脛折翼傷悲鳴而絕夫鶴雲水  
物也古稱其壽最長莫知所極今茲鶴也不能遠跡  
物表以全天年余甚悲之請瘞焉而爲之銘曰

振振其容皎以章翮哉一舉天際翔芝秀于畹榮  
泉沸汝嬉而游安且肆奚樂之違離氛埃不覓于  
年嬰厥菑西山之足收爾骨山有白雲川有月



讚

四友讚

弘農之石耶銅雀之瓦耶磨之琢之維以昇我者耶  
爾形惟方爾質惟剛剛哉方哉方哉剛哉永以爲吳  
氏之藏

右碑

洋洋乎浩浩乎聖人之言也聖人徂矣獨其言猶存  
孰其載之惟爾之云

右紙

若在軍旅爾維刀戟若作稼穡爾維錢鏹斯其爲儒  
林之奇貨而不可須臾捨也夫

右筆

玄之又玄衆妙之門者耶摩頂放踵以利天下之人



者耶無偏無側惟我存惟其有之是爲文

右墨

屏上畫讚

冕而搢珽者拱於前彼一老翁面無須麋息未凭牛  
背有言語之容吾知殷室之阿衡也讚曰

有夏標季比屋可誅彼莘之郊獨也康衢耕斯鑿  
斯孰余敢呼我有羶行湯實蟻趨始也囂囂終則  
于于天顧一德匪弋獨夫君曰都兪臣奏厥謨處  
焉唐虞出焉唐虞維此阿衡爲萬世模靖言庸違  
彼何爲乎

有操繪素而進於前者彼一丈夫身如植鰭捐捐畚



竿間宛然畫中人也豈非武丁之良弼乎讚曰

風從虎矣雲從龍矣一德相符雖遠必逢吾不知  
高宗之夢夢傳說耶將傳說之夢夢高宗也真爲  
夢夢爲真又惡辨真之與夢蓋有莫之爲而爲者  
我欲訊之無是翁也

簞簞竹竿以釣于川髮皤如矣齒豁如矣似若不數  
數於世者至其際風雲之會虎跳而鷹揚沛乎莫之  
能禦日擊畫圖猶可想周太師之儀容也讚曰

卷而懷磻溪之釣人奮而起周室之宗臣一丈之  
竿爲八域之棟樑一縷之絲爲四海之經綸是知



獵於賢者文王之大獵也釣於國者尚父之大釣也彼搏鹿而擲鼈者其爲漁獵也小矣

先生在床睡二三客回皇門外一童子出而肅客宛然劉豫州三顧草廬時也讚曰

天寒歲陰龍之伏也雲蒸霧涌龍乃躍也其伏也如之何潛正中之德歛神明之機介然遯乎世而樂其樂也其躍也如之何茫洋乘風雨上下于天倒四海以蕩八域攝六丁而震不若也旣伏而旣躍矣卒不能窮其變化則非我不靈天拂我也繫乎我者我則任之懸諸天者吾無奈也吾珍葛侯



雖與日月爭光可也

玄鶴琴讚

我夢御風以觀清淵鳥獸悲吟山林莽然彼人誰居  
手揮鳴絃撫余心授言不可傳得未曾有是名水仙  
鶴儀于前其羽維玄星翻月落蒼濤黏天

燕超齋遺稿卷之四



燕超齋遺稿卷之五

記

金將軍鐻拔二毛營記

人皇三十二載歲攝提格帝庸誕誥股肱曰維茲二  
毛之營據彼白頭之山習黃老之術倡尚白之論變  
幻百出不恒其實惑亂我黔首侵侮我犁老玄風職  
此而日頽元首于是乎叢脞康者以之憂少者以之  
老俾我黎元罔不愁苦擢髮之罪不可毛舉苟不早  
爲之圖則蒼黃之變翹足可須肆予不怠握髮之心  
詢茲黃髮之人孰能爲朕將者僉曰有金鐻者金華



之人函冶氏之子銅額類蚩尤銳頭似白起氣剛百  
鍊之金心堅一寸之鐵真所謂鐵中錚錚者也帝曰  
格汝鐻朕聞將軍有拔萃之才老久矣肆朕以爾拜  
爲鐵面御史錫以拔毫將軍之號邊頭之事一以委  
之將軍欽哉鐻拜手而起抵掌而談曰臣鐻塊處平  
首山之東躍入乎大冶之爐遂藉陶鑄之功獲蒙器  
使之恩秋毫皆帝力也誠欲刮垢磨光以效毫毛而  
臣實不材敢辱拔擢之寵自速銅臭之譏哉竊竊容  
成侯罔有鑑物之明直指使爪有撥亂之才其能皆  
在臣右惟帝念哉帝曰吁將軍過矣彼二臣者朕匪



曰不能然炯也能察而無武爪也雖甲而不銳難獨  
任惟將軍能持闔闢之機且兼制變之才其爲朕將  
之鑷稽首曰敬奉詔翌日清晨將進攻帝迺左秉白  
旄而告之曰惟彼毛營其來已久而厥初則未嘗有  
二者之別蓋自朕生髮未燥泊乎髫髻之齡蒼蒼黎  
首維朕是戴故錫之以旄丘寵之以湯沐撫之養之  
多歷年所是衆也恃其一髮孤城併起爲亂苟一日  
不治則自相結締合而無統散處於窮髮之域絲棼  
繩亂中外騷然惟朕閔之屢加屨櫛束之以禁網矣  
越至于今有白生者與其徒髯叅軍等連營於白水



之鄉固其根蒂厥類寔繁相與聚首颺言曰公道世  
間惟我輩又各私立名號或曰白毫子或曰太白競  
相標幟與其一種之尚玄者各峙焉此二毛之名所  
由起也自茲以往尚白者日益夥尚玄者日以流入  
而變其質噫誤天下蒼生者孰大於此由是墨墨之  
化浸浸然衰微其危若一髮引千鈞凡諸垂髮戴白  
者罔不寒心豎毛苟非拔萃之才其孰能一之肆朕  
屈首於將軍假手以拔將軍無謂我耄老而舍我必  
也如手捍頭剪厥醜類以無怠厥職吾聞不禽二毛  
者宋襄之假仁也拔一毛利天下而不爲者楊朱之



曲學也將軍慎無若也抑又聞之黃眉老翁三伐其  
毛軒轅先生以氣攻髮必用此爲務則亦職有利哉  
雖然卞別白黑不可不審將軍必惟精惟一克明克  
察治其昭昭之白過拊我芸芸之黎庶拔奸擿伏搜  
抉纖悉白之又白去之無遺玄之又玄存之無失俾  
有黑頭公之號毋貽禿髮氏之譏也苟擇焉而不精  
則何異於火炎崑崗玉石俱焚也哉將軍勗哉帝廼  
命指揮使某與鑷偕鑷廼令掌書記毛穎草咫尺之  
檄檄曰銀青光祿大夫執金吾鐵面御史拔毫將軍  
金鑷移檄于二毛營蓋聞黔首惑亂而不救則非仁



雜種侵凌而不除則非武故自昔苟有非其類者率  
皆拔而去之今爾等幻奪玄機開營白地殆有甚腹  
心之疾豈可謂毫釐之差朝則如絲暮則如霜變詐  
百出喜者以憂少者以老愁苦萬民海上十九年漢  
使之髮盡化鏡裏三千丈謫仙之詩猶傳潘中郎之  
興悲良有以也王右丞之起歎豈徒然哉茲予受命  
人皇誓剪醜類俊髦咸集英豪悉來直指使之勁鋒  
進退有節容成侯之清鑑毫毛莫逃遂焉整師予以  
進擊或躡其後而捽其髮或觸其前而滅其髭殲厥  
首魁不待吹毛刀之利刃革其舊染豈藉馬肝石之



神功切齒則皓鬚之匹夫就禽咬牙則白頭之將軍  
失色拔彼白鵲之幟立此皂鵬之旗所謂秋毫之輕  
迎風而散何異鴻毛之細如火卽焦汝其歛其凶鋒  
撤其營柵毋恃縱橫之勢以俟薶粉之期言出肺肝  
我非老耄草檄成帝見之大喜曰此愈我頭風矣於  
是白毫子率其衆其會如林鐻乃切齒而前左右挾  
擊一舉而拔之遂撫養黎庶秋毫無所犯帝嘉之曰  
偉哉將軍之功微將軍吾其披髮矣且寡人之國上  
首功之國也予其加將軍以茅土之封爾惟欽哉乃  
冊鐻爲聶耳王都於毛民國寵之以紫綬賜姓拓髮



氏其所俘獲投諸水火自是厥後班白者不復戴而  
玄風稍振矣帝乃命掌書記毛穎爲之記

不憂軒記

余浮于江而西豐山洪子與余俱卽舟中發其橐裝  
得不憂軒升櫬之文余問焉曰夫軒安所在爲之者  
其誰耶曰是余江上之茅廬也卽甚庠且隘無所芬  
華然立取直吾腰臥取伸吾膝尚足也啓吾牖表裏  
江山入吾室左右圖書是其於遊息焉藏修焉爲宜  
余字謂洪子曰季毅子之軒誠美矣請問不憂何解  
今夫田原不遇歲室若懸磬然灶突弋迴中不煙秋



而虞於續春而虞於綌以爲妻孥謫子能不憂於是乎曰余幾乎而猶未也童而治學食淡攻苦涵洪併織以時出之夫旣閔且肆矣乃不能中有司程度年至二毛猶僂然一縫掖也人且相爲惜之子獨能不憂是乎曰余幾乎而猶未也曰然則子之言不憂者奚姑假以自耀歟不然將病夫所不能不憂而有意乎進夫能不憂者歟曰是余意也曰子之志誠遠矣抑余則有復焉凡憂之生恒存乎不自足苟足乎已憂於何有彼其誹譽得喪日夜相錯于前而崔韋乎其心遇一拂意勃然不釋小憂悄悄大憂忉忉終身



無一日息是皆不自足之患也桂史漆園之徒因是而遺外物蹈昏冥齊指哀樂蕩洋自適其不憂似也顧難以爲訓唯吾聖人獨不然循乎天理安乎義命隕然其素位而無慕也浩然其獨立而不懼也時行而行被袵鼓琴不爲泰時止而止簞瓢棹茹不爲臞易曰樂天知命故不憂此之謂也今季毅儒者也於老莊氏之言猶方員之不相入則不睎舜若顏誰睎也譬此舟焉北期燕至燕南期楚至楚唯行而不息也請試與子擊櫂乎樂天之波揚帆乎知命之津以登乎不憂之岸其可乎季毅曰善願子筆之吾歸張



吾軒

序

送元秀才道亨序

古者農者必有耦詩曰千耦其耘語稱沮溺耦耕所以齊勤惰而通事功也婦人同巷相從夜績所以同巧拙而合習俗也如甘茂所謂江上處女可見也是以種學績文之士其藏脩游息必有共之者孔聖論損益之友子夏氏有離索之嘆彼豈將羣居嬉遊而已夫亦致其齊一之功如農夫紅女之爲也元生居平原之酒泉酒泉僻土也無經學子弟生慨然負笈



聿來于堤從一二同志刻意鉛筆之間余亦廁遊其中朝往暮來殆無虛日信可樂也余既窮居交遊日益落生獨眷焉不遺猶海客之逐臭不知生將何求於余而勤勤若此生今將歸矣索余一言之貽乃擇言曰耕者勤作而旱澇之不時天也紅女勤作而蠶桑之不遂時也學子勤業而窮通之不齊命也生去矣肆力無怠磨厲而須之可也因觴之酒而與之別

贈堂弟汝重序

敦牂之春余從兄汝賓甫被疾于堤有習乎醫者踵門蘄其方醫者案其脉爲之發藥藥果良獲以瘳將



復于中原余以其疾之瘡也緊惟醫者是賴推廣醫道以言曰醫之術誕略有四太上醫國其次醫家其次醫身最下醫人斯其精痛之等己兄曰余也願聞其詳醫人而何曰伎之偏也自好者曼云和鵲之傳是己身曰全其神減其欲蠲其疾登其壽鏗聃幾矣先病而後醫衆人也哉家曰固欲言也意蓋在是乎一羸一詘由晦明也一榮一悴由微纒也明者用詘爲羸用悴爲榮蠹其反之盍嘗視吾謀乎光光乎明德遠矣旣或拓厥基而昌大之導厥流而條達之其勤而此夫今而日病天天或者大儆吾而降之福未



可知也其終棄之亦未可知也在今我後人夙夜祇  
栗惟懼不給矧敢自盤自逸宗之渙也其何日之有  
苟志乎醫其家者亦曰求諸己而已名言懿行光乎  
方冊非苟悅之亦允執之思不忝厥先祐之自天其  
何病之不瘳凡我昆弟親黨念于茲惟懼夫扞之右  
厥善率其不能庶有豸乎兄乃躅足曰善哉善哉雖  
有加於是不遑聆也越季夏堂弟汝重自京師屈于  
茲將載牽于嶺之南矣重也美秀而甚文如以取道  
也吾以重爲茲白乘黃矣於其行將擇言旣而曰昔  
者吾與吾兄言矣遂以贈重乎歸覲吾昆弟親黨亦



以是告

員山靜瑟叙

談仙家云環天之和樂有員山之靜瑟焉西王母悅之陳諸瑤水之上蓋音無此最悲者乃委巷窾啓之士方且擊甕拊缶快意當前適觀而已其於聞若說則瞠如也苟非深思遠覽飄飄然有凌雲之意者夫焉能騁驪駒而躋弇山使殊廷異音洋洋乎盈耳哉則穆王之志荒乎不亦萬世一快哉今夫歌詩者亦樂之一物也興自葛天下降乎晚周則篇籍稠殷學者不能究其業夫子之刪蓋什一矣嗣是而代興者



雖軌則浸變要亦一家之音也乃昭明之撰自魏晉以降悉矣於秦漢以上者抑何厪厪乎一斑也至唐則鴻匠並驚體裁賅具號稱大成其鏗鏘幻眇之變極矣而淳慤質直之風亦少貶矣然後之佔畢者指爲畫一之程無敢紛更之卽蕭氏之書猶將弁髦之何秦漢也余也不佞於作者無能爲役亦獨嗜古不衰間嘗斷自前漢以上其謳謠詠歎之音爾雅可覽觀者旣蒐而彙之其東京以下卽有甚雋永者亦刺之裘葛婁易稍稍就緒每索居多閒梯几而呻吟之其音節瀏瀏殆足以發皇耳目矣顧出而視諸人鮮



不瞠然者彼其以爲越人之章甫哉卽不佞益自喜  
不止方侈然以穆王之聞於王母者命其編蓋將與  
深思遠覽者同其快不能與竅啓拘學者同其疑也  
皇明風雅叙

古稱燕爲勃碣之間一都會於周官職方爲幽州其  
山曰醫無閭藪曰獫狁養川曰河洑甯曰菑時者是已  
其風氣扶輿鬱淳鍾於物則爲珣玕琪之珍鐘於人  
則智深勇沉之士間出焉戰國時昭王起黃金臺築  
碣石宮厚招天下雄俊弘辯智士有若望諸君談天  
衍之徒爭馳騫焉其后世田光宋意荆卿高漸離之



屬又皆翩翩有節俠風悲歌慷慨氣蓋北州蓋亦人  
之所謂賢豪間者矣明興太宗舉全燕南向而撫寰  
內遂定鼎於燕燕爲天子京師京師四方之所輻湊  
觀瞻以爲極者也故當時天下士大夫高氣節有故  
燕時風今睹其形之爲文辭者其爽朗紆餘則報燕  
惠書之故轍也閔大窳冥則大瀛裨海之餘波也發  
揚蹈厲則易水變徵之流響也信矣風氣之所渙發  
豈古今異致哉蓋明之爲明危三百年矣其間以文  
名者不可悉數乃何李劒立颺聲狎主齊盟刳心古  
則氣凌羣言則信壯矣及乎元美龍騰虎步方羊天



下叱咤而千人廢當其時能負氣矜豪終不北其面  
者于鱗一人而已二子者之心方且鞴鞅鞅鞅左鞭  
弭而右橐鞬不乞靈於晉魏不假途於東京進而與  
左氏馬氏爭驅而讓登豈肯溟滓然弟之哉其爲詩  
則選材於騷選濫觴乎開天大曆以下固毋論也當  
世之聞其聲者懼然顧化鴈行避影無敢以齊晉之  
賦而歌代興焉嘻何其盛哉顧徐而察之豪舉而或  
流於怛中程古而或屬於攘掄要之沾沾多易者或  
過而從容中道者或不足則豈代有窳隆而力與志  
盪邪且或獨樹標幟黨同伐異如晉江毗陵之雅而



文老亦且引繩而批根曾不爲李將軍地則抑何褊  
心也寶黃廝赤豈通方之謂哉雖然興衰補敝一激  
頽波則鄉之數君子實有力焉故余嘗推有明數家  
爲文苑之霸主是何也昔周德旣衰諸侯力征不復  
知有共主五伯者興而乃始翼戴王室王室與有賴  
焉若其徵包茅於邵陵則疑於義存亡衛於虛塾則  
疑於仁誇嫖其疆則折鈎之喙足以吞三翻六翼張  
王其勛則太山玉牒思厠七十二君之編錄可不謂  
雄偉不常者矣乎雖然執五霸之跡絜長度短乎古  
昔隆平之君其純疵之懸絕居可知矣然則數君子



之於文也殆亦類是哉余既采錄諸鉅公詩凡若而篇以見其誕略又推本風氣之所繇來而總論一代人文之大致如此嗚呼昔之金臺碣石帝都天府忽焉蘊墻而毳幕矣彼其曳裾鳴玉而摘藻挾天庭者而今安在哉以此思哀卽奚待宋子之擊筑而泣下沾衿也哉嗚呼

### 虎史叙

史者王官之一守纂言述事其職也世之閔辯洽聞之士徃徃自負其能而不能假螭坳之寸管以裁成一代之大典則必有癢於中而不容自閔者或推原



物類之情或攜撫稗官之遺以就其業而寓史之名  
焉夫然後職不必蘭臺蓬觀人皆可以史事不必皇  
王帝霸物皆可以史史之道於是博矣夫虎之有史  
非古也今松坡李先生筆也先生之爲是書也凡傳  
紀子史詩文辭賦之語卽隻字片簡有麗於虎者無  
所不哀采猶以爲未也又刺取我東虎事之可錄者  
錄之蓋得乎談賓之傳奇山趾之故實者爲多間又  
標以評斷準正史之例引類比物文指犁然切於事  
情有可以砭世之憤憤者卽所載時有猥穢不根先  
生故以是爲滑稽也苟欲以莊語槩之不亦癡人譚



夢哉嗚呼先生文章不世出蓋嘗光顯于朝明習國  
家文獻因以紬金匱石室之藏勒成不刊之典其又  
奚難焉顧晚塗偃蹇遜于荒野其殺青之業厯夷於  
稗史之流則時之所遇者然爾否者班椽故事何獨  
寥寥至今哉雖然是書之作也抑殆有旨矣今夫吹  
萬不同紛綸卓詭盈乎天地之間接乎耳目之境蒐  
奇獵雋盡史家之良料也乃先生之所論著不出乎  
擇肉之戾虫果何解歟昔者楚之史曰檮杌檮杌者  
惡獸也曷爲爲書而惡獸名之也斯義也蓋嘗聞之  
矣夫作善者循乎性有不待勸而興焉作惡者悖乎



性無不待懼而懲焉故舉惡而不舉善將以致其嚴而懼之斯乃楚人之志也然則是書也儻亦有檮杌之意乎不然豈其無麒麟騶虞而必於菟之史哉先生命之叙不敢辭

跋

跋韓景洪九辯帖

韓景洪書宋玉九辯按其識實萬歷甲午於今百有十年矣字畫視逸少被稷叙頗細莊而婉勁而媚蓋善之善者景洪嘗自言夢見右軍得三昧法精神所感會豈虛哉余聞之始景洪攻臨池業莫有奇之者



及中華諸公如屠長卿輩交口稱其能於是始藉甚甚矣微獨能者難也抑知之實難昔楊子雲祿位容貌不能動人故輕其書蓋自古悲之鄉使景洪生於卿士大夫家其所自見豈不易爲力耶邇歲委巷子弟稍解浣壁卽浮慕鍾王數家呼景洪爲隸人甚且引繩批根多見其不知量也因從人觀是帖漫書之

跋己卯諸賢尺牘

文章道之細竿牘其細之細者然其叙寒溫布情素率然直致無暇脩飾胸臆之所渙發躍然造真境每可以得其人矣今讀己卯諸賢抵幾齋安公書疏人



各若而幅卽片語尺蹠初不經心者悉曲有意致其  
切磨相成之義夭壽不貳之操隱隱乎其不可揜百  
世之下足以激慙夫之膽斯其可敬也又覽柳川河  
西二公所論叙其闡揚者勤矣先輩東原崔公蓋嘗  
手寫是帖褰未終而公卽世今三紀矣不佞於公之  
孫用夏父友也一嘗與寓目焉旣用夏甫以其尊府  
命謂不佞其完之不佞不敢辭旣成而歸之且語曰  
子之先大夫實拳拳于是子知其解未無亦將泐其  
細而究其大者乎子其卒成先大夫之志吾爲有望  
矣闕逢君灘姑洗之月書于樹蕙堂

今幾齋公後裔  
家帶方世傳是



帖以爲寶後靜菴先生七世孫遠  
守帶方時求分爲二家之藏云

# 論

## 晉文不賞子推論

人臣有能爲恒情之所難爲以殉其所事之君者其  
君固德我無窮而顧其比肩同事之臣必內愧其不  
若而憤忮之心乘焉甚且引繩而出秘陰排而默擠  
之卽其君之德我深終必駸駸乎與之化而賞功酬  
勞之心於是怠矣此必至之勢也昔晉文公之出亡  
也嘗餒於曹而從者介之推割股以食之旣反國賞  
從亡者而不及於子推旣而子推之從者懸書宮門



而愬之然後始環綿山而封之以爲子推田噫人方  
阨困窮約時卽有簞食豆羹之惠者必思所以厚報  
之況若子推自殘不訾之軀以殉一朝之急其忠其  
功顧誠何如而曾以文公之賢忽焉棄之若遺必待  
從者之言然後封之哉是必有繇然矣蓋嘗因其情  
而逆探之有以知狐趙諸公之陰沮之也何者當公  
子之淹恤在外其從者狐偃趙衰顓頊魏武子司空  
季子皆一時之翹楚也故左氏叙其從臣首舉此五  
子而偃之智衰之文顓頊之勇武白季之博古蓋斑  
斑屢見而餘不及焉則佗從者舉不足以及五子者



可知也當斯之時公子之所倚以共患難者不出乎五子而唯五子者之心亦自以功無與讓矣暨乎曹共有觀狀之辱從臣闕橐餽之供道路遠矣窮餓迫矣智者無所騁其智勇者無所施其勇而堂堂貴介公子將不免溝中之瘠維是子推慨然出乎諸從臣之後飲泣抽刃割其股而啗公子於是乎公子之德子推出乎諸從者之上而諸從者亦且相顧咨嗟始而驚中而愧終而忌思所以揚其短而抑之則必曰天實開公子以主晉國卽微子推腥臊之肉公子其終止於此乎又不然則曰人能忍其所難忍者是必



情有所激而計有所圖者也昔易牙殺子以食君豈  
不近於忠乎而管敬仲以爲非人情不可近今推也  
亦是類也讒一至而不信再至則疑信半三至則信  
之矣當子犯之授璧於河上也子推方身處乎羣非  
衆議之間而猶且切切然姍笑子犯以爲要市於君  
直犯其左腹而不顧意者子推之爲人婞直而好招  
人過者也婞直則少與招過則多基其基之也愈多  
而其排之也愈力矣是故文公之報勞臣也大者封  
邑小者尊爵長第且徧而祿不及於子推子推於是  
乎不能無怨懟之意故歷詆二三子以爲貪天之功



而已獨矯然鵠逝隱於綿上終身不復踐晉廷焉噫  
隱繇山而不出豈子推之本指哉實有激而爲也遺  
子推而不賞豈文公之初心哉實有繇而然也不然  
國難初靖伯圖方啓執勦舊臣固欲共保尊榮顧奚  
快於乾死窮山寂寞之鄉乎不然旋軫故國柔嘉是  
食則割股之忠若宜不忘一飯而酬報之典寧獨後  
於他人乎嚮非龍蛇之歌有以回文公之心竊恐子  
推之忠終身不白於世而環山之封不復施於文公  
之世也今其歌著於史氏之錄睹其比物連類辭義  
宛轉真可以動人故文公念德之心勃然不可遏而



向之所帶薊者渙然若春冰之釋矣於是自引其過  
立命求之求之不得則就加之封而從而爲之辭曰  
吾方憂王室未圖其功此遷就之語非至言也何以  
明之公之入在魯僖公二十四年春正月而叔帶之  
難乃在於其冬其間定功行賞殆且無遺矣如子推  
之忠之功卽未下車而賞之夫誰曰不宜而顧反稽  
留而靳施哉自非然者是推也文公不貳心之盡臣  
狐趙輩共患難之故人耳當其翼贊新主定黜盟府  
飄纓紆組烏奕聯翩而惟彼一介同袍方且竄影伏  
跡於太山嵒巖之下則獨不能一掉寸舌以回明主



之聽而顧今介氏之客先之哉吾故曰子推之不賞  
狐趙輩沮之也或曰狐趙諸公晉國之名卿也夫豈  
至是哉曰若狐偃之要君也顛魏之藝僖氏之宮也  
此其人非恂恂退讓君子亦明矣其又奚難焉昔漢  
文帝嘗病癰使太子喈癰喈癰而色難之已而聞鄧  
通常爲帝喈吮之心慚而喈之竟以危法中通通遂  
餓死君臣且猶如此況於同列者乎或又曰凡詮古  
者必因其跡子獨逆探其情而臆斷之得爲定論乎  
曰執空文者泥而不達探情趣者皦而易明嗚呼吾  
安得起子推於九淵而質之哉



楊雄論

爲人臣者不幸而處革命之際孰不欲引誼以潔已哉然徃徃怵於禍偪於勢蒙恥而虧節不然則貪廩仕係厚祿不能決去之不然則昧義樂禍甘心移天而不顧若楊雄之仕於莽果奚當哉朝不坐燕不與進與退綽乎由己則謂之地偪勢危不可恬於榮利恥爲巧宦至三世不徙官則謂之貪權懷祿不可雅慕聖哲動稱仁義則謂之傾狡樂禍又不可然則雄何爲而仕莽哉曰雄於聖人陽浮慕之而實與悖故蹉跌而至此也雄之言曰仲尼於南子所不欲見也



於陽貨所不欲敬也見所不見敬所不敬不詘如何  
詘身將以伸道也其意以爲道苟伸矣卽羿浞猶將  
詘身而臣之無傷此其蔽也君子之爲道也天下有  
道則以道殉身天下無道則以身殉道道未始離身  
而孤行也何詘身信道之有哉必若所云則舐痔摩  
足贅肩諂笑亦無害於道之信歟雄之披猖失己由  
是蔽也盖自成哀以來政在王氏移鼎之形成矣忠  
讜亮直之臣發憤訟言者幾何矣惟么麼諛側之徒  
相附麗爲引重迹雄之始實王音門下史也其拔跡  
與欽永輩等耳又觀法言之卒章與劇秦美新之文



蓋不惟臣之顧稱美之不己此與張竦陳崇何異使  
雄不知惡而爲之至愚也知惡之猶且爲之至諂也  
諂與愚雄必處一矣噫雄之拙身則己甚矣抑其所  
伸者何道也雄嘗爲太玄賦歷稱夷惠之徒而曰我  
異於是執太玄今蕩然肆志無拘攣今是欲以夫子  
之無可無不可托而逃焉爾夫子之堅而不磷白而  
不緇也而於佛盼公山之召蓋將往而卒莫往雄乃  
覲然臣纂賊而妄自附於聖人其可哉將以學聖人  
之道耶節己虧矣將以學聖人之書耶名又僭矣信  
乎雄之於聖人陽浮慕之而實與悖者也論者顧往



往溺乎文辭之美而不深惟其本末爲之湔洗而崇  
長之至葛洪曾鞏之徒乃舞筆游辭以爲雄之事合  
於箕子仲尼之道噫其甚矣自漢降戾後世販國易  
主曾無忤色者滔滔也則非雄實倡之其誰也余不  
可以不辨

說

學琴說

客有抱琴而過余蕙晦之草廬者余肅之八坐定客  
爲余鼓琴一再行其聲泠然而清縹然而遠揚如厲  
風之吹衆竅而古松幽澗之激而響也瓊琚玉珩之



穆然鳴也令人翛然有遺世獨往意余甚樂之進而問之曰技蓋至此哉如欲學是將奚以哉意者其以譜乎客曰余少也好琴載之末年矣嘗見學是藝者有二道焉或不求石師徒按古譜讀其聲而布其爪喙喙詭詭早夜不休方且謂子野師涓可幾及也徐察其終則音調節族清濁疏數悉錯戾而相奪未卒其亂而下里之人且啞然笑之况望其馬仰秣而魚出聽玄鶴之翩然乎來而翔也且或求當世之能琴者而師之始於操縵終於安絃惟其提誨是聽得法於指得意於聲其爲功徑且省而亦未有未成者也



既略通其方則又叅諸譜以撫覈其音節必有犁然當吾心而怡然順吾情者夫然後譜亦爲吾用也故曰學琴者當先其師而後其譜也噫客之言誠有理彼口誦姬孔之籍者故不若身登程朱之堂已乎雖然輪扁之言曰臣不能以教臣子非所謂寸心獨喻者哉夫道可以言傳者道之餘也音可以絃盡者音之粗也至若言表之玄思絃外之虛響非夫神遇而心聽者其焉能得之且客不聞之乎昔之學琴者如伯牙之於成連曠歲而未得其至及乎假之以海山峭蒨之境而發之以幽憂感慨之情則始極深造微



而疑於神矣然此猶止於技也若吾夫子之學之也  
既習其數明其志則又穆然深思怡然高望而得所  
謂幾然長眼望羊者蓋通乎道矣是師襄之所遜席  
反走者况待乎區區之譜哉易曰神而明之存乎其  
人殆謂是歟客瞠然如有省己而復取琴鼓之行油  
然而退

畫說

昔有良畫史爲淵明歸去來圖中置弊廬用一木支  
之或難其故應之曰淵明之所自叙曰云環堵蕭然  
不蔽風雨則其不有漂搖歆傾者乎或稱善有學之



者繪岳陽樓而又欹而撐之客見而嗤之曰甚矣子之惑也彼所畫者淵明之弊廬也子所畫者天下之偉構也子又惡用是欹傾撐拄者爲哉畫者大慙人到于今笑之然余觀世之業此技者鮮不類是何獨詆娐彼刻哉余家有屏風其所畫爲古之仁聖賢人如伊摯傳說周公太公諸葛武侯之事蓋輓近國能也顧其冠服率類今制其狀貌又不應古傳記是其爲僣也去彼幾何哉噫以信傳信其弊猶僭以妄傳妄弊將若之何夫古人冠服儀狀其詳不可得而聞然載籍所記猶有存者三代之冠爲毋追爲章甫爲



委貌而又有收呬弁之名儒冠緇布法冠柱後惠文  
武士鶡冠野夫黃冠其佗漢之竹冠魏晉之幅巾齊  
隋之幘羅代各殊制博物者所能言也堯眉八彩舜  
目重瞳子文王長身周公狀如斷腦伊尹面無須麋  
傳說身如植鰭漢高祖隆準龍顏世祖日角其雜見  
子史者甚多可覆視也奈何人之喜鑿空而忽稽信  
也彼繪屋而失者其樑欒榱桷猶有似也繪人而失  
者其肖貌儀飾無可仿像猶且披圖而指之曰是爲  
伊傳是爲姬呂諸葛云爾則其何誣如之謔神如道  
玄妙如立本且不免木劍帷帽之謬而况下此者乎



抑余觀夫世之學士大夫守其一曲之見不達同異之辨師心而倍古順非而言僞則其爲害豈特畫繪之謬哉吾黨二三子戒之哉

祭文

祭申叅判厚命文

嗚呼我公休聞夙振奮鱗矯翼爲王之蓋咨余識公于今幾閏托好嫺嫺義敦秦晉欸悃綢繆擺落畦畛日公背洛寔爲時擯介居江濱定跡歛軻三舍非遙宿眷可進間接清眇屢枉芳訊譬彼執熱旣濯以汎關東大府公起知印捫輿西上天陞將覲誰謂中



途遂嬰美疾虞淵末景稅鑣何迅自初寢疾浹辰之  
僅承凶幅抑屑涕交隕適公之館撫孤省殯我心之  
苦奚啻嘗董徃在攝提公喪其胤雖則剛腸奈此情  
刃公顏瘦削余爲公愍庶幾神葆期願可準云胡風  
燭奄及一瞬倏幽告終天實不慙公之處世律躬惟  
慎壯歲策名終逾耳順隨流平進匪籍推引翺翔省  
闈作時髦儔聯翩佩符巨邑雄鎮秩亞踐斗孰云匪  
峻巷寡輪鞅困靡儲物釜魚餽塵舊云今信貞其素  
履赧彼慙恪今焉卽冥曷以殮觀婉孌幼孫齒未毀  
齟匍匐號公其能認浮生飈忽有如洞薜賢愚一



軌天壽同盡昧者之憾達士攸哂念昔投分罔或緇  
磷倏焉冥漠想像容髮情條雲互憂緒糾緊大江之  
北有山千仞卜云其臧靈輜且鞫荒埏載啓穀朝是  
遴豈忘執紼抱瘵莫趁替奠醪羞敢告不敏

### 祭人文

嗟無祿宗不競人有黨如雲盛我獨無心怲怲天不  
備理難證我曾考德聞炳越後人宜膺慶昆裔彫僅  
紹姓孫及曾君我並枿階級倚形影尚無蟪茲攸幸  
君方强大命竟身益孤慟何勝昔童丱頑莫訂君之  
考勤提警鼓書篋如醉醒我不天違禍告斬焉衰漂



如梗君有廬許假倩義形色睦因性噫去歲冬之令  
先壠改新兆定挈雙櫬路修夏余斃斃血漸領如隻  
手扛鴻鼎事無緒藉君整勞不憚唯我聽軫急難涉  
遠徑歸唁我遄其騁蒙霜露越川嶺庶覲面在俄頃  
倅來諗二豎橫隔十里無由省余卒愕憂心頗診者  
誰惟季孟藥未投纔已冷若見溺無舟艇中流沒莫  
可拯俛仰間滅其頂膈如劒涕橫迸旅於歿道於病  
遠妻孥視不瞑君之生塵滿甑君之逝室懸磬余又  
客缺賄贈念脫驂頽面頤思匍匐非無脛方在疚意  
莫稱哀此世一幻境生也寄死也靜譬朝槿隕夕景



嗟哉君薄於命逝在壬生在丙及乃考俱不永四十  
七獲壽等有兒紹善之應日月邁歲事更筮幽竈行  
且崩塌不竭哀何罄陳茲文酌彼涸匪風發噎以哽

### 祭文

祈方兮訊藥古人巨之蠲痼不逢祐兮亦無懟重罹  
殃兮喪軀則那秋之首兮交手一月不詹兮懷子實  
多余反彼兮不遠而近聞故于塗兮殆其訛旋余號  
子于館兮冥以漠兮有嘒無詹親老兮在堂若何去  
斯兮不寧而承孺人咷兮杞城崩自子之亡兮毀將  
不與幼穉滿眼兮誰倚以爲生秋日霽兮哀風起中



聞嘈嘈兮行人惴魂離恒幹兮永終天兮無還期嗟  
天畀子以窮兮何迤邐之孔夥童習于辭兮白而輒  
軻終貧且窶兮何又壽之不將紹後之無兒兮朋友  
惻傷聞天道兮猶張弓何斯言之茫茫瞻彼西浦兮  
昔君是營墻壁之未完兮亦旣荒止中心怛絕兮涕  
淫淫其如雨潘楊之睦兮亦惟舊又重之以昏媾撫  
君令女兮愍茲失怙玄月之將終兮簡此元辰啓殯  
兮非遙蒿里兮荒涼曠宵兮無朝陳詞流勸兮酌此  
清醪

祭鄭司評奎祥文



嗚呼哀哉公生德門秀氣孤凜溫恭孝友中剛色莊  
允矣賢哲宜享鼎飪干祿不回輟于庶品筆公緒餘  
古風凜凜自天取將賁于路寢人伐其藪公允如  
嗟晚歲菟裘松檟攸廕息偃衡茆泉漱石枕禽魚自  
親不驚不淊惟靜乃壽何恙斯甚人生寔難疇不視  
蔭歲匪龍蛇賢嗟成讖報善以郵天道難審嗚呼哀  
哉家君托契若醇之飲自公委化惻愴靡禁公定有  
日遠役于錦小子覲德風敷其衽追陪杖屨爾來十  
稔興念舊驪有如拾漚不腆醪羞矢哀以諭嗚呼哀  
哉



祭洪注書萬通文

嗚呼哀哉子生華宗章彙蔚也壘塊落穆露正骨也  
邁往直前氣不斂也爲彼暗豎獨揭揭也豹別龍騰  
釋其褐也進塗旣闢逞無遏也詭時不偶乃斃斃也  
越在方將豎爲孽也陰陽有沴中潏潏也輔以刀圭  
屏翳孽也日吾有役歷子室也子實羸瘁我憂惓也  
神之所勞尚終吉也自我交手月再闕也赴問己及  
何其忽也秋駕未試驥先蹶也干將已淬鐔中折也  
命與材舛理涸次也鶴髮在堂忠養撤也桂華不實  
似續絕也魂其有知能無怛也嗚呼哀哉孰無中表



獨吾密也臭蘭之心郁以鬱也禮有先飯實疏節也  
宴處譚笑情不竭也憶在執徐西余轍也隱伏旅次  
頗不出也爰就爾宿語刺刺也余懷急難泗以咄也  
子所介介在房闥也肝膈之言不可述也相鄉以咤  
長夜徹也今焉興念若一瞥也言猶在耳增結悁也  
嗚呼哀哉已而已而萬事訖也營君幽宅有弟姝也  
子歸其居永隱沒也地底冥冥誰與匹也人生實難  
尺波閱也智愚貴賤同湮滅也闔視其良爲秋實也  
松陰月寂悲泉咽也鶴唳猿吟哀風發也魂以爲車  
氣爲軌也撓挑無際遊恍惚也萬歲千秋歸無日也



舉觴長辭方寸裂也嗚呼哀哉

雜著

讀荆軻傳

荆軻爲燕丹提匕首入咸陽刺秦王不中以死軻之死燕亦亡噫鄉使軻得成其事必如丹之約契其果能紓燕國之禍乎吾以爲必不然也何以言之使軻把秦王之袖而刼之可能也果能使秦王必反其地乎吾知其不能也使軻搃秦王之胸而殺之可能也果能合諸侯而逆秦之兵乎吾知其不能也夫如是則適足以速禍而已矣禍之可紓假如秦王旣死扶



蘇繼之李斯之智焉而輔之蒙恬王翦之猛焉而將之與師問罪鼓行而東則山東諸侯必膝行朝秦而燕王之首懸於咸陽之市矣奚暇合從以謀秦哉昔吳王夫差亡國之主耳尚能苦身養士禽勁越如射隼夫吳之勁不敵乎秦夫差之賢未逮於扶蘇越之勁又不啻累敗之燕而猶尚如此況以扶蘇之賢席父兄之威帥強秦之甲以臨弱小之燕哉燕之虛莽不待旬日而決矣由是言之荆卿之劒雖試秦王之頭奚益乎燕哉吾嘗謂始皇之不死非燕之不幸乃秦之不幸也何則始皇之惡禾稔而徑斃以賢太子



而嗣之有智勇士而將相之兼之以卒乘之富戈甲  
之精并天下直易易耳天下旣一施其德惠撫厥黔  
首阿房之宮不起漁陽之戍不發雖有百勝廣百劉  
項將無繫之可乘柏翳之鬼何遽忽焉而不祀哉故  
曰始皇之不死乃秦之不幸也且吾以扶蘇之諫始  
皇繩諸生者知扶蘇之世必無土儒燔經之禍由是  
論之始皇之不死扶蘇之不立非特秦之不幸實天  
下萬世之不幸也

辨孔叢子

余讀孔叢子曰爲此書者多謬也舉其一以辨之陳



士義篇曰邠成子自魯聘晉過衛右宰穀臣知衛將有亂托其室焉背衛三十里甯喜作難右宰死之乃使人迎其妻子攷之左氏傳甯喜之難在魯襄公二十六年甯喜將納獻公右宰穀止之喜不聽穀請使焉見公子夷儀返曰不己死無日矣二月庚寅甯喜右宰穀攻孫氏伯國死辛丑殺子叔及太子角明年獻公使免餘殺甯喜右宰穀吾意穀與穀臣實一人而二名也何以知之以其多同也國同衛名同譚官同右宰死差一歲爾然其所死不同何也孔叢子之謬也其爲謬奈何春秋凡死於國難者如孔父仇牧



荀息見於經其微如石之紛如昵如州綽賈舉皆不  
書而俱見於傳誠有穀臣者死於寧喜之難雖不載  
於經左氏其獨遺之乎春秋時列國卿大夫士名若  
字見于傳者多不一可覆視也是歲春免餘攻寧氏  
不克夏復攻而殺之然則穀臣之事其在免餘再舉  
之日乎始穀臣之使於夷儀也既知禍之必及及是  
日寧氏實納君而君攻之吾與寧氏一也禍其迫矣  
遂寄室於郇子耳孔叢子乃以爲死寧喜之難豈不  
謬乎又春秋無郇成子如晉之文豈以微歟

晉之人



晉厲公時晉之鄙人有遊學者至都三月而反其父  
謫之曰昔者吾遣汝往也固望曰是將成其業有列  
于朝以光大吾宗也今汝名不登于籍學三月而歸  
無爲吾望爾也乎何其亟也其子曰吾驚焉惡乎驚  
曰昔吾之至都也問國之巨室焉則有卻氏三卿焉  
赫赫晉國實尸其政東與齊侯構難相遇於鞍蹠血  
千里以報婦人之笑辱列國震懾莫之與亢其居則  
有崇臺廣榭高閑邃苑靡於公宮出則輿服麗都前  
有光後有輝國人嚮焉賓客麋至其把國也固矣其  
取威也弘矣君之嬖人甚之道君爲難一朝而肆諸



市如刈草菅樂氏中行氏與焉釋之係纍之中二子  
執公而弑之夫顓如三郤而夷焉貴如荀樂而繫焉  
尊如晉伯而弑焉其足賴乎厚味寔腊毒高位寔疾  
僨用福甚者受禍酷取名多者蒙責重自然之勢也  
吾聞莒之東有石焦原焉其垂崖若一髮臨百仞之  
谿人畜墜未半阬谷無不糜碎東西行過是者即捷  
疾如猱必目眩股弁相戒不敢自焉今晉廷之爲焦  
原也大矣吾寧猱獲也哉而無懼險也險而不知懼  
能自完者與有幾夫以三家之寔也郭外之田猶可  
以數晦農力其中畜雞種黍亦足以自給何有於仕



貴仕禍之招也盛名灾之引也一跌而縲綫隨之再  
跌而刀鋸繼之當此之時麤糲之食聚廬之居莫得  
而有焉此吾所爲驚也其父曰誠然乎吾與汝隱矣  
君子曰晉之人可謂知矣利近而患賒非智者莫之  
睹也故世未嘗無三郤而鑑者希矣其父不違也超  
然遠引亦可以爲賢矣詩曰惠而好我携手同歸此  
之謂也

書柳子厚辨列子後

劉向錄列子爲鄭穆公時人稽其書所載多抵牾柳  
子辨之當也柳子以列子與駟子陽同時子陽相鄭



繻公其死在魯穆公十年遂疑向言魯穆公時而謬  
爲鄭然列子鄭人也故向特舉某國某公以見之如  
柳子之言天下之爲國多矣奚必魯之挈耶柳子獨  
譏向考究之不翔斯可矣特見繻公之時天下諸侯  
謚穆者有一魯君存焉引而爲之辭庸非失乎凡諸  
子書爲後人所贅虧非一家之言者爲多如管子記  
桓公之卒司馬史援楊雄之言尚足論其世乎無寧  
憇置之爾

書滄溟集後

文章其以世升降乎上下數千百載寢下寢卑猶流



水之不可挽而還也司馬子長西京之傑然者嘗觀  
乎帝紀大率遵尚書之舊徃徃易其文不曰平秩而  
曰便程不曰庶績咸熙而曰衆功皆興彼豈憾舊而  
樂新哉其亦離古而循今者矣至楊子雲爲太玄法  
言以擬易論語論者猶病其愛奇已甚至唐而韓柳  
特盛未始以鈎章棘句爲高乃樊宗師皇甫持正實  
愛奇者也宗師矧奇自心其書滿家斯難能也顧今  
之傳者希矣持正之言曰書未足爲奇惟易爲奇如  
龍戰于野其血玄黃見豕負塗載鬼一車突如其來  
如焚如死如棄如可不謂奇乎持正之好奇如此其



所爲文雖徃徃可見亦不大行豈愛奇已甚而卒不  
奇耶明興百王後作爲文章不無人矣或疏其源或  
闡其流均之有意古作者而于鱗爲尤所嗜好而誦  
法者惟周秦漢數家而已其下者結舌而不譚瞋目  
而不視甚矣其好古也其爲文聲牙譎詭甚者不能  
以句嗟夫生乎數千載之下志乎數千載之上蘄與  
左氏之子司馬氏之孫顏行而肩隨之斯可謂難矣  
然世之好其文者亦罕見幸其去今未遠吾猶及覩  
其成書抑百載之下可幾其必傳乎吾恐後之視于  
鱗猶今之視宗師持正也言之者苦心而好之者實



鮮蓋自古悲之矣若夫周秦之文未始不奇而亦未始好奇其世古其文亦古宜與夫季世不類後之慕古者絀平正務奇詭斬以合古滋離真矣天下固有似而非有異而同鄭人使其妻爲袴其妻曰今袴如何夫曰象吾故袴其妻因毀新象故此之謂似而非魯人有獨處室者夜有嫠婦托焉魯人閤之嫠婦曰子胡不如柳下惠魯人曰柳下惠則可吾固不可孔子曰期於至善而不襲其爲善學者也此之謂異而同竊譬之于長退之子厚之爲文魯人之學柳惠也宗師持正于鱗之學古鄭女之象故袴也于鱗之詩



世固有嗜之者余所論其文者如此

讀金仁山書義

嘗讀通鑑前編其所載尚書傳義旨意精奧多發前人之蘊今博士弟子於書獨治蔡傳蔡傳則靡不善矣顧義理精微蠶絲牛毛又奚謂是已盡矣不復措語矣哉無亦謂利達之途不繇是而已劉子駿云學者有祿利尚不能明易又如玄何嘻蘭谿之書其束閣也何恠焉余於是三致歎也且前編不獨行也必與通鑑俱通鑑表故繁且汗牛矣甕牖孤學之士得一讀少微之選則已矣能覩其全者寔鮮何前編也



余故嘗欲取其中爲書義者別寫爲一書以爲蔡傳之羽翼廣諸同好而未暇焉耳嗟夫九峰之於晦翁繼志述事之巨子也仁山之於九峰補過將美之良臣也治書者叅二家之同異而窮其本原則庶乎其得之矣按史公所著有尚書表註豈前編所載者卽是歟將不同歟是未可知也仁山蔡人少學事同郡王魯齋又從何文定遊文定之學得之黃勉齋爲朱子之嫡傳則仁山之學其淵源正矣弟子許謙號白雲先生得其傳亦爲名儒史又言仁山當宋元之際絕意進取講道蘭江之上以此自終其出處之義賢



於許魏公遠矣

擬徐孺子與郭林宗書

穉白林宗足下無恙足下東脩礪行盛德日新卓爲人倫之表海內薦紳游士依以揚聲令問廣譽被于遠邇邇甚休甚休若僕之愚誠無能爲役雖然朋友忠告古之道也敢不略意易曰潛龍勿用又曰天地閉賢人隱君子出處語默與時偕行焉可苟也足下朗鑑遠識天下寡二先幾測微固已審矣仰睹玄象之變俯叅人事之紀謂今日何等也泰乎否乎安乎危乎夷之初朝明而未融懷臣都衡樞勲腐把國命譴



興於民謫見于天三光闇昧山川崩竭此誠國家陽  
九之會而賢人隱晦之秋也僕謂足下將超然鵠逝  
浮游塵埃之外而顧周旋轂下隱默不去是僕之所  
未喻也竊忖足下之意悼世溷濁計存補苴諄諄誨  
誘導善化愚冀幸俗之一變故睠顧而不能舍也君  
子之憂斯世猶慈母之伏死子知其不可奈何而不  
忍決去惻怛之至也雖然滄海橫流非一塊所可障  
大木將顛非一繩所可維今足下之力不過撮土尋  
約而天下之禍非直狂瀾標木而已嗚呼豈不殆哉  
僕竊恐無補於敗而適足自塵也昔宣尼當晚周之



際轍環天下而道終不行爰有乘桴之歎以今視春秋之世又加遠矣夫子不能正之於前而足下乃欲救之於後殆將難乎國家中興百餘年間興庠序厲士節紳佩之倫嬪然滿路觀其雍容言議蹕厲風發信乎其彬彬矣至於樹標幟引繩墨汙公朝甄覈臧否此招蓄之道也吾恐焚坑之禍自此始矣當斯之時雖聖人復起不能爲己不審足下何術而救之哉僕願足下垂思大易之義深覽仲尼之歎旋車言邁考槃丘園紬書拊琴以詠先王之風亦足以優游卒歲全此令名何爲棲棲不遑寧處隱顯之際君子



所慎惟足下圖之

擬郭林宗報徐孺子書

孺子足下辱賜書教督以所不及慇懃甚厚閱其愚蔽拔之迷塗足下真愛我哉足下真愛我哉方今天地氣閉君子道消綱絕紐解愚智寒心所謂天之所廢不可支也竊觀劒履間健者猶數三公卒莫能振頽維矯曲朝樹國家不拔之業直搏手立視而已況僕太原一布衣耳居前無所軒處後無所輕又敢知天下事哉抑古人有言嫠不恤其緯而憂宗周之隕泰也不佞失於自揆依違不去優游衣冠之間悉心



啓告矯枉輔直庶幾彌縫敗闕粗見裨益區區之志  
於是畢矣曾不悟理盡道窮莫可支柱以及茲浪浪  
也昔人有憂江河之涸而泣以益之其志雖勤庸何  
補哉嗟乎吾過矣吾過矣凡足下之云皆明哲之至  
論出處之司南也泰敢不謹拜斯言以爲師表哉行  
當脂吾車秣吾馬稅駕桑梓之鄉息影東岡之陂畜  
雞種黍以竟餘齒過是以往不復措懷

余讀漢史至徐孺子郭林宗貽書相告報得處亂  
視身之道未嘗不慨然太息也嗟夫彼二君子之  
賢且知使其遇於世漢事猶可爲也顧且以自隱



不顯爲先計於二君子何病有國者之醜也及夫  
鈎黨事起一時諸名勝皆絀於禍高至於死下且  
流徙殆不可勝計而林宗獨超然自引繩墨之外  
卽史氏所稱不爲危言覈論者固足以遠禍於濁  
世抑孺子之書與有力焉余旣嘉二君子相與之  
義而惜史氏不能備錄其書以傳諸後今可見者  
數語而止耳聊爲引伸以資拊掌

覽平泉草木記

物之聚也恒於篤好而有力者好不篤則倦於所以  
謀之力不足則難於所以鳩之故必二者具然後物



乃聚贊皇殿方岳握鈞軸最久方其盛時力足以移  
山轉海而又隆好花鳥樹石之翫意有所規卽隴右  
日南殊鄉絕區之產且見以爲籬落間物也今讀平  
泉草木記凡伊洛諸名園所有者不書書其最奇而  
獨有者然其名種之繁如此非夫篤好而有力何以  
致是哉其遺誠云壞一草一木者非吾子孫則抑過  
矣彼奇卉異草葩芬斐亶姑以取悅一時則已矣奚  
至詒厥話言哉而况物之盛衰聚散有必至之理初  
不容人力者哉且夫卉木之與吾身孰重贊皇以七  
尺不貲之軀豈不欲長處巖廊劒履之間哉猶且一



跌而出鬼門涉鯉波卒飲瘴而死又况卉木之區區者而可長保哉己且不能自安於是又况子孫而世守之哉又况期之陵谷遷變之後哉是則通人之一蔽也嗟夫所好於卉木者將以因物而適我也非以役我而徇物也世之留好是物者朝培而夕澆之寒藏而燠出之勞形敝神而不自休是爲卉木役也惡在其適也乃余貧且賤無藉在卽欲效贊皇之爲者勢未可性又懶散不能任培壅澆灌之勞惟是山英野卉自榮自凋萬種十名爭艷代妍穠穠乎不知其極吾且因地之阜隰而養之因天之露雨而滋之可



以悅吾目可以適吾心奚往而不平泉哉詩曰豈其  
食魚必河之魴善夫

滄浪翁茅山別業十六景小識

振屨軒

新月山之東麓森蔚饒秀色俗云始筇堤時鄉役者  
振黏屏塵土所成也其言詭誕不根未足據然其相  
傳爲名實久因而文之稱振屨云滄浪翁暇日游陟  
于此得異處焉喜曰此真吾菟裘哉乃鬻減獲累十  
指充締架之費既就緒復顏之以振屨盖不亶取諸  
山亦取王元美弇園記中人人思振屨之意也軒正



疎山腹疎豁寥朗登之令人有獨立物表意啓北戶  
俯睇林湖可二十武所林薄葱蒨映帶隱約蓋得湖  
者四之二正如覩西子半面妝耳東南層嶂複岫縹  
緲挿天如小白上岳錦繡諸山皆隱隱負竒目徑中  
不下席盡可撫而有之正以處地高也始游於湖者  
必先至大松亭及軒成而此徑幾綦塞所謂二陸入  
洛三張減價者不虛哉其它紅流湖月紫烟諸勝境  
皆游蠟所不及屨軒主人始冥按窮覽而後秘藏畢  
現無還可不爲開山一祖哉

### 義林池



池在縣治北二牛鳴泓澄湛碧其深不可測其周可  
十里所蓋泉源觴勃仰出者不知其幾處云所浸漑  
甚廣堤人賴其利其鱗物多鯽鯪之屬其羽物則鳬  
鷺鷥鵝之屬多菱芡蒹蒲可充豆實中置蜻蜓艇以  
待游者

### 于勒堂

于勒蓋大伽倻國伶人也伽倻之君嘉悉政亂勒以  
樂器奔新羅新羅真興王館之國原命智法偕古萬  
德傳伽倻十二曲勒善彈琴嘗作十二絃琴又作玄  
琴後浮游江湖間不詳其所終世傳以爲仙去云今



其堂之遺址在林池東石峰之南舊傳勒所居也或曰堤之始起勒與有勞焉故後人祠勒於此無掌故可据余疑報賽者卽因其故居而二說者傳聞有不同耳有井在堂之良隅甚清冽至今稱于勒井云

### 燕于巖

巖在林池東北舊傳于勒彈琴之所今釣魚者多于此垂綸

### 大松亭

亭在池坤隅與燕巖相直案衍洞豁俯臨平湖喬松三四章儼然離立暑月猶颯然有涼意昔有縣人魚



泳津多拳勇嘗斬蛟池中懸之亭松其事甚奇偉  
讓周子隱哉

湖月亭

亭在新月山最高頂俯瞰林池渺瀰映帶其名之以  
此敞豁軒爽令人有憑虛出塵想

大堤

堤之設蓋起於羅代勝國時蓋累決而累修之今所  
稱古堤卽其蹟也 國朝嘗發三路丁壯增築之鄭  
河東實董其役今壽藤灌木樛錯如織而隄防益堅  
矣每夜靜月明緩步堤上宵窅清邃輕涼四逗爽沁



肺腸澄湖如鏡浮光相射瑣碎眩眦便有茗雪間想  
會心處正自不遠

### 銑池

池在林湖水筒之外所以承其流節蓄洩之宜者也  
久廢不修前洪使君重禹浚治之遂復其舊櫺軒主  
人實贊成之邑人受其利中作小嶼植以嘉卉池西  
有蒼松錦石奇秀可念且種千柄芙蓉其中乃可爲  
新婦配叅軍也

### 瀑布

每夏月水潦降池水汎濫爲飛瀑倒下穹石可數十



丈散而爲漫天之雪噴而爲破山之雷詭怪奇壯令人神魂懣然毛髮灑淅真彷彿項王破章邯時也

龍潭

林池洩流從紅流洞西南流可二三里峽盡郊平石聳湍激蓬湧感沸聲震雷霆只步之間不分人語其下爲深潭泓澄靈霽

紫煙臺

從屨軒之後陟新月山蛇紆西南行可數十步始得臺松栝森挺涼颼颯至逗不肯去以其宜於望瀑故取太白廬山詩中語名之



## 紅流洞

洞卽林池漲波之洩口也其始蓋岡巒相接非有洞也。因湍流盪激刮除成空呀然一洞天闢矣。懸崖峻削林壑窈窕悄蒨森爽窅然若陽明句曲間游也。有泉潺湲出林間琮琤之韻若操琴然其色殷紅則潏沙映之也。紅流之名因此。每春時兩山雜花競發斐亾吐芬影倒清流爛然若紅錦。此亦稱其名矣。從洞底仰視林池所可見者。僅若方丈鏡游者鼓漁舠歌襖靄過之。真若仙侶凌波者不復知爲人間世矣。不知孤雲所稱伽倻紅流亦有此勝境否。



綠

柳灣

池北多楊柳濃綠。罨靄榜舟入其中。自涯望者不知處也。

蓴洲

湖之北近岸水淺處產蓴。絲脆露凝。淨滑狀水筋。自前輩稱其甚美。無雙。第不知較諸陸內史所稱。未下鹽豉者。孰爲勝之。每五六月中方盛採。者榜舟而入。用長鎌刈之。取供不竭。自十數年來。稍損不及前時之盛。豈窮措大無染指分耶。

外郊



卽縣治北郊也迤延數十里原隰龍鱗溝塍綺結春  
苗匝綠秋實懸黃耕諶饁謳種種野趣岡隴起伏若  
覆敦狀碁置平遠中如北斗之數煙火間起雞狗相  
聞縣郭村舍歷歷指掌間矣

內郊

湖之北岸平廣爲郊量其周可十里而羸 朝令禁  
民開墾叢林長薄蔚然滿目矣綠山而居者塵兩三  
家烟火蕭條麋鹿成羣雉兔甚蕃令人有擎蒼意每  
春夏時平綠夭夭極望無際牧者萃焉歌謳互答脩  
然有野情覺午橋粧點尚涉強安排也



燕超齋遺稿卷之五終



此我舅氏燕超齋吳公所著詩若文蓋福川之吳  
有晚翠默齋竹南以文章名世公卽默齋玄孫以  
截特之才生匠石之門甫就學而出語輒膾炙人  
口及長爲古文辭清鬯警絕颯颯有大曆間風誠  
希世之音或言公效李唐詩是不知公者噫公天  
賦秀朗襟韻清灑對之直照映人人目之爲神仙  
中人宜其發於中形於言者自合於唐不然唐豈  
可學而能之乎余固不能詩題品不敢到若使其  
殘馨剩馥磨滅不傳是後死者責遂釐爲若干編  
以俟後之玄亭而已公諱尚濂字幼清年二十八



而終嗟乎詩之能窮人如是甚耶公之歿或傳有  
異事公嘗居堤川平日吟哢多在義林池上豈于  
勒琴八百年絕響公其得之也耶吁可悲也已昔  
崇禎紀元後再乙丑甥姪嘉義大夫行成均館大司  
成兼同知 經筵義禁府春秋館事李益炆謹跋











黑土口占

忘掛不何尋。韶風發。其結回首意。未窺林外。良吹。豈  
靜然。心轉。青。融。覺。聖。氣。興。人。靈。幸。是。夢。縣。林。賦。雅。  
獨。續。委。和。具。雲。隨。鼎。火。野。前。金。同。美。里。其。載。自。蘇。如。  
客。思。自。謝。然。雲。長。報。何。齡。委。今。五。蒼。華。東。齡。照。亞。景。  
聯。大。歲。盡。里。轉。轉。人。及。共。完。必。結。寒。子。背。入。昨。冷。整。  
裡。融。融。木。縣。林。童。合。影。寒。氣。上。百。樓。寒。蕭。斜。轉。蒼。華。  
歸。巢。裡。田。冬。水。落。前。城。所。長。報。好。冬。交。南。爐。外。蘇。京。  
身。風。人。何。醉。寒。融。奏。望。藝。口。寶。氣。幽。泉。新。新。歲。新。離。  
辭。辭。落。葉。響。蕭。蕭。輕。林。漫。林。吹。翠。出。步。寒。山。盡。天。年。







